

Samichlaus ich bin en Freak

Samichlaus ich bin en Freak
Weiss immer was ich wett
Am liebschte sitz ich am PC
Und surfe gern im Internet

Online si isch mega lässig
S'macht Spass so umezklicke
S'macht Spass all mine Fründe
Es luschtigs E-Mail ischicke

Samichlaus ich hätt mich gern
Au mit dir verbunde
Han aber leider dini Homepage
Eifach niene gfunde


Hätt ich nur ned so viii Schiss

Hätt ich nur ned so viii Schiss
Wenn ich die schwere Stiefel ghöre
Hätt ich nur ned so viii Schiss
Wenn's chlopfed a de Töre

Ich weiss es isch de Samichlaus
Mis Herzli gumped umenand
Er luegd mich aber fründlich a
Und git mir sanft si grossi Hand

Ich han ned immer gfolget
Eimal beinah gloge
Mit de Gspändlj gstritte
Und a de Haare zoge

Axgüsi, liebe Samichlaus
Das isch ned richtig gsi
Ich mach es sicher nümme
Pack d'Fitze wieder i



Ich freu mi liebe Samichlaus

Ich freu mi, liebe Samichlaus
Du chunsch bi eus verbi
Sicher bisch es bitzli müed
Vom wiite Wäg do hi

En schwere Sack hesch mit dir treit
Bis zu eusem Huus
Jetzt muesch en nümme länger schleppe
Leer ihn doch eifach uus

Samichläusli, Samichläusli

Samichläusli, Samichläusli
Chum ine, mach es Kaffee-Päusli
Din Sack isch einewäg viii z'schwer
Drum ässed mir ihn gschiider leer

Ned schimpfe, liebe Samichlaus

Ich bin en chliine Chräbel
Und mache gern es Witzli
Hütt isch's mir aber gar ned drum
Ich fürchte mich es bitzli

Ned schimpfe, liebe Samichlaus
Ich han ja d'Händli gwäsche
Gib mir lieber öppis Feins
Us diner grosse Täsche

Samichlaus was isch au los?

Samichlaus was isch au los
Gsehsch du wien ich schwitze?
Ich han glaub es bitzli Angscht
Vor dir und vor de Fitze

Samichlaus so säg mir doch
Dass du kei n Böse bisch
Und mir anstatt de Fitze
En Sack voll Nüssli gisch

Samichlaus du hesch es streng

Samichlaus du hesch es streng
Bisch s'Johr dur uf de Huet
Immer weisch du ganz genau
Wer bös isch und wer guet

Sicher tuesch du jede Tag
Dis goldig Buech studiere
Und alles was dir vo de Chind
Z'Ohre chunt genau notiere

Samichlaus so säg mir doch
Dass du kei n Böse bisch
Und mir anstatt de Fitze
En Sack voll Nüssli gisch

Hesch scho ghört dass i mim Zimmer
Alles ufgruumt isch?
Dass ich am Mammi hälfe
Und aständig bin am Tisch?

Ich plange uf es Säckli
Voll süesse feine Sache
Denn würd ich all die Arbet
Au s'nöchtsch Johr wieder mache



Gäll Samichlaus das macht doch nüt

Ich han es grosses Hobby
Wo s'Mammi loht usraschte
Denn bi jeder Glägeheit
Sitz ich vor em Flimmerchaschte

Mir gfallen alli Sändig
Mit coole, junge Lüüt
Es bitzli Fun, es bitzli Action
Gäll Samichlaus das macht doch nüt

Wenn d'Schuel würd drunder liide
Wär das alles schlimmer
Aber det git's keis Problem
Denn d'Ufzgi mach ich immer

Danke herzlich Samichlaus

Es Hüsli stoht im dunkle Wald
Versteckt und ganz elei
Am Abig chunt en alte Maa
Müed vo de Arbet hei

Doch s'bliibt kei Zyt zum usrueh
Zum gli Firabig mache
Er muess no Zimetsterne
Und Läbchüechli bache

Denn de Schneesturm wüetet scho
Es zieht enorm dur alli Ritze
Höchsti Zyt zum Zwiigli binde
Für die unbeliebte Fitze

Am Chlausetag do stapft er los
Muess mänge Hügel überwinde
Er treid en grosse Sack mit sich
Voll Gschänkli für die liebe Chinde

Danke herzlich Samichlaus
Du hesch eus mächtig überrascht
Bliib doch grad es paar Tag do
Mir bhaltet dich als euse Gascht